

I. DISPOSICIÓN XERAIS

MINISTERIO DE AGRICULTURA E PESCA, ALIMENTACIÓN E MEDIO AMBIENTE

10835 *Real decreto 851/2017, do 22 de setembro, polo que se prorroga a situación de seca prolongada declarada para o ámbito da Confederación Hidrográfica do Segura polo Real decreto 356/2015, do 8 de maio, polo que se declara a situación de seca no ámbito territorial da Confederación Hidrográfica do Segura e se adoptan medidas excepcionais para a xestión dos recursos hídricos.*

A escaseza de recursos hídricos en 2014/2015 no ámbito territorial da Confederación Hidrográfica do Segura conduciu á declaración de seca aprobada polo Real decreto 356/2015, do 8 de maio, no marco das medidas adoptadas polo Goberno para paliar a situación de seca que se está sufrindo con especial intensidade nesta zona.

Este real decreto tiña unha vixencia temporal ata o 31 de decembro de 2015 pero, dado que a situación non mellorara nesa data, a declaración de seca foi prorrogada pola disposición adicional terceira do Real decreto 817/2015, do 11 de setembro, polo que se establecen os criterios de seguimento e avaliación do estado das augas superficiais e as normas de calidade ambiental, ata o 30 de setembro de 2016.

Con posterioridade, e mediante o Real decreto 335/2016, do 23 de setembro, polo que se prorroga a situación de seca declarada para o ámbito territorial da Confederación Hidrográfica do Xúcar polo Real decreto 355/2015, do 8 de maio, e para o ámbito territorial da Confederación Hidrográfica do Segura polo Real decreto 356/2015, do 8 de maio, prorrogouse novamente a declaración ata o 30 de setembro de 2017.

A demarcación hidrográfica do Segura constitúese como un sistema de explotación único con dous subsistemas principais, o de bacía e o do transvasamento. Da análise da situación de ambos obsérvase que, aínda que o que motivou inicialmente a declaración de seca foi o estado en que se encontraban os aproveitamentos vinculados ao transvasamento Texo-Segura, esta situación de escaseza afecta tamén na actualidade as explotacións que dependen dos recursos propios da bacía.

A falta de precipitacións nestes tres últimos anos nas cabeceiras do Segura e do Texo, pero especialmente nesta última, motiva tanto o descenso da achega aos encoros como do volume que estes almacenan.

Así, a achega que recibiron os encoros da cabeceira do Segura no período abranguido entre os días 1 de xuño de 2016 e 2017 foi de 222 hm³, cantidade que supón menos do 70 % da media histórica dos últimos 30 anos. Esta falta de achegas provocou unha diminución das existencias propias da bacía desde o 36 %, que acumulaban hai un ano, ata o 21 % actual.

O estado global do sistema bacía, que aglutina os dous subsistemas referidos, encóntrase na actualidade en situación de emerxencia e presenta un valor inferior ao que se daba na data en que foi aprobado o decreto de seca inicial, arrastrando unha tendencia negativa que se remonta a marzo de 2014 para a cal non se observa perspectiva de cambio a curto e medio prazo.

Esta situación global de emerxencia é consecuencia dunha situación de alerta no subsistema bacía e dunha de emerxencia no subsistema transvasamento. Para este subsistema transvasamento resulta previsible que o indicador reflecta nos próximos meses niveis mínimos históricos de achegas e volumes susceptibles de seren transvasados.

En relación con este subsistema transvasamento resulta necesario observar, en todo caso, o establecido na disposición adicional quinta «Reglas de explotación do transvasamento Texo-Segura», da Lei 21/2015, do 20 de xullo, pola que se modifica a Lei 43/2003, do 21 de novembro, de montes, dado o seu carácter de réxime xurídico

prevalente, de modo que a declaración de seca que agora se prorroga non derroga nin permite a inaplicación do réxime especial previsto na dita lei, que será de obrigada aplicación nas distintas situacións que se poidan producir.

Por todo o exposto anteriormente, cómpre prorrogar novamente as medidas extraordinarias establecidas no Real decreto 356/2015 ata a finalización do ano hidrolóxico 2017/2018, en previsión de que esta situación de seca se prolongue ao longo do tempo.

Neste sentido, esta situación de escaseza motivou a aprobación, recentemente, do Real decreto lei 10/2017, do 9 de xuño, polo que se adoptan medidas urxentes para paliar os efectos producidos pola seca en determinadas bacías hidrográficas e se modifica o texto refundido da Lei de augas, aprobado polo Real decreto legislativo 1/2001, do 20 de xullo, e cuxo ámbito de aplicación se proxecta, como non podía ser doutra maneira, na demarcación hidrográfica do Segura. De maneira que as medidas contidas neste último instrumento complementan as previstas no citado Real decreto 356/2015, do 8 de maio. En consecuencia, resulta de aplicación a medida prevista na disposición adicional segunda, en virtude da cal ata o 30 de setembro de 2018 se realicen as cesións de dereitos ao uso de auga non por dereitos realmente usados, senón polos concedidos, suspendéndose, pois, este próximo ano as limitacións contidas no artigo 69 do mencionado texto refundido da Lei de augas.

A prórroga da declaración de seca realízase neste real decreto en cumprimento do disposto no artigo 27 da Lei 10/2001, do 5 de xullo, do Plan hidrolóxico nacional, e no 58 do Real decreto legislativo 1/2001, do 20 de xullo, polo que se aproba o texto refundido da Lei de augas, e tendo en consideración o estado do sistema e subsistemas de explotación da demarcación segundo o Sistema global de indicadores hidrolóxicos do Ministerio de Agricultura, Alimentación e Medio Ambiente, que integra os indicadores de estado definidos nos plans especiais de actuación en situación de alerta e eventual seca nas bacías intercomunitarias, aprobados segundo a Orde MAM/698/2007, do 21 de marzo, en cumprimento do establecido na Lei 10/2001, do 5 de xullo, antes mencionada.

Na elaboración deste real decreto foron oídas a Confederación Hidrográfica do Segura, así como todas as comunidades autónomas que puideren resultar afectadas.

Dado o carácter de urxencia que reviste esta disposición, derivado das consecuencias que provoca a situación de seca, na súa elaboración abreviouse o trámite de audiencia e información públicas, segundo o disposto no artigo 26.6 da Lei 50/1997, do 27 de novembro, do Goberno.

Na súa virtude, por proposta da ministra de Agricultura e Pesca, Alimentación e Medio Ambiente, de acordo co Consello de Estado e logo de deliberación do Consello de Ministros na súa reunión do día 22 de setembro de 2017,

DISPOÑO:

Artigo único. Prórroga da declaración de seca aprobada polo Real decreto 356/2015, do 8 de maio, para o ámbito da Confederación Hidrográfica do Segura.

Prorrógase ata o 30 de setembro de 2018 a declaración de seca aprobada polo Real decreto 356/2015, do 8 de maio, para o ámbito da Confederación Hidrográfica do Segura, prorrogada inicialmente pola disposición adicional terceira do Real decreto 817/2015, do 11 de setembro, polo que se establecen os criterios de seguimento e avaliación do estado das augas superficiais e as normas de calidade ambiental, e novamente polo Real decreto 335/2016, do 23 de setembro, polo que se prorroga a situación de seca declarada para o ámbito territorial da Confederación Hidrográfica do Xúcar polo Real decreto 355/2015, do 8 de maio, e para o ámbito territorial da Confederación Hidrográfica do Segura polo Real decreto 356/2015, do 8 de maio.

A prórroga establecida no punto anterior estará condicionada á evolución do indicador de estado do Sistema global da bacía do Segura conforme establece a Orde MAM/698/2007, do 21 de marzo, pola que se aproban os plans especiais de actuación en situacións de alerta e eventual seca nos ámbitos dos plans hidrolóxicos de bacías

intercomunitarias. En tal sentido, o organismo de bacía afectado e a Dirección Xeral da Auga do Ministerio de Agricultura e Pesca, Alimentación e Medio Ambiente deberán constatar que a evolución das achegas de recursos se mantén nas condicións de escaseza que determinaron a necesidade de declarar a seca.

Disposición adicional única. *Gasto público.*

A realización de obras e outras actuacións técnicas que sexan precisas como consecuencia da prórroga da declaración de seca que se establece no presente real decreto deberán ser financiadas de acordo coa normativa vixente e con cargo ao orzamento da Dirección Xeral da Auga.

As medidas incluídas nesta norma non poderán supoñer incremento de dotacións nin de retribucións, nin doutros gastos de persoal.

Disposición derradeira primeira. *Título competencial.*

Este real decreto dítase ao abeiro do artigo 149.1.22.^a da Constitución española, que lle atribúe ao Estado competencia exclusiva en materia de lexislación, ordenación e concesión de recursos e aproveitamentos hidráulicos cando as augas discorran por máis dunha comunidade autónoma.

Disposición derradeira segunda. *Concordancia de preceptos entre os plans hidrolóxicos vixentes e os derogados.*

Para os efectos do establecido na disposición adicional segunda do Real decreto 356/2015, do 8 de maio, polo que se declara a situación de seca no ámbito da Confederación Hidrográfica do Segura, as referencias feitas aos artigos 23, 33, 26, 48, capítulo IV, e a táboa XI.1 do anexo XI do Plan hidrolóxico do Segura, aprobado polo Real decreto 595/ 2014, do 11 de xullo, entenderanse feitas, respectivamente, aos artigos 28, 33, 10, 56, capítulo IV e apéndice 6.1.3 e 6.1.4 do vixente Plan hidrolóxico aprobado polo Real decreto 1/2016, do 8 de xaneiro.

Disposición derradeira terceira. *Entrada en vigor.*

Este real decreto entrará en vigor o mesmo día da súa publicación no «Boletín Oficial del Estado».

Dado en Madrid o 22 de setembro de 2017.

FELIPE R.

A ministra de Agricultura e Pesca, Alimentación e Medio Ambiente,
ISABEL GARCÍA TEJERINA